

Broj: 02-1072-5.d)/24  
Sarajevo, 08.04.2024. godine

Na osnovu člana 35. Statuta Nogometnog/Fudbalskog saveza Bosne i Hercegovine, Izvršni odbor Nogometnog/Fudbalskog saveza Bosne i Hercegovine, na sjednici održanoj dana 08.04.2024. godine donosi

## **PRAVILNIK O SARADNJI KLUBOVA WWIN LIGE BIH I PRVIH LIGA NS FBiH I FS RS**

### **Član 1.**

Ovim Pravilnikom uređuju se pitanja u vezi ugovora o saradnji koje zaključuju nogometni/fudbalski klubovi koji se takmiče u WWIN ligi BiH u seniorskoj kategoriji sa klubovima koji se takmiče u takmičenjima prvih liga NS FBiH i FS RS u seniorskoj kategoriji, pravo nastupa igrača na osnovu tih ugovora, kao i druga pitanja koja proizilaze iz zaključenih ugovora o saradnji.

### **Član 2.**

Za potrebe ovog Pravilnika pojmovi imaju sljedeće značenje:

- a) Ugovor o saradnji – ugovor koji zaključuje klub najvećeg stepena takmičenja muškog nogometa/fudbala u seniorskoj kategoriji u organizaciji NS/FS BiH (u daljem tekstu: klub najvećeg stepena takmičenja ili matični klub) sa klubom koji se takmiči u najvećem stepenu takmičenja muškog nogometa/fudbala u seniorskoj kategoriji u organizaciji NS FBiH ili FS RS (klub nižeg stepena takmičenja ili ugovorni klub).
- b) Mladi igrač – igrač profesionalac ili amater, koji ima zaključen ugovor sa klubom i registrovan je za klub najvećeg stepena takmičenja, koji na osnovu ovog Pravilnika i zaključenog ugovora o saradnji ima pravo nastupa za klub nižeg stepena takmičenja te na dan 01.07. relevantne takmičarske sezone nije stariji od 23 (dvadeset tri) godine. Mladim igračima, u smislu ovog Pravilnika, smatraju se i dva igrača koja su na dan 01.07. relevantne takmičarske sezone stariji od 23 godine i uvršteni su na listu iz člana 4. stava 5. ovog Pravilnika.
- c) Matični klub – klub najvećeg stepena takmičenja muškog nogometa/fudbala u seniorskoj kategoriji u organizaciji NS/FS BiH za koji je registrovan mladi igrač i koji ima zaključen ugovor o saradnji sa ugovornim klubom.
- d) Ugovorni klub – klub najvećeg stepena takmičenja muškog nogometa/fudbala u seniorskoj kategoriji u organizaciji NS FBiH ili FS RS i koji ima zaključen ugovor o saradnji sa matičnim klubom.

### **Član 3.**

- (1) Ugovore o saradnji u smislu ovog Pravilnika mogu zaključiti klubovi najvećeg stepena takmičenja sa klubovima nižeg stepena takmičenja, odnosno, matični klubovi sa ugovornim klubovima.
- (2) Matični klub može imati zaključen samo jedan ugovor o saradnji sa jednim ugovornim klubom.
- (3) Ugovorni klub može imati ugovor o saradnji samo sa jednim matičnim klubom.
- (4) Ugovori o saradnji se dostavljaju voditelju takmičenja prvih liga NS FBiH i FS RS radi evidencije.
- (5) Ugovori o saradnji zaključuju se u trajanju od najduže jedne takmičarske sezone i traju zaključno do 30.06. tekuće takmičarske sezone.
- (6) Ugovori o saradnji mogu se zaključiti najkasnije deset dana prije početka jesenjeg dijela takmičenja u kojem nastupa ugovorni klub.
- (7) Klubovi mogu ugovor o saradnji sporazumno raskinuti i prije isteka roka na koji su zaključeni, a takav se sporazum dostavlja voditelju takmičenja Prva liga NS FBiH ili Prva liga FS RS. Prestankom važenja ugovora o saradnji prestaje i pravo mladih igrača da nastupaju za ugovorni klub.
- (8) Ako matični ili ugovorni klub za vrijeme trajanja ugovora o saradnji iz bilo kojeg razloga prestanu sa takmičenjem u seniorskoj kategoriji, ugovor o saradnji automatski prestaje važiti.
- (9) Klubovi nakon isteka ugovora o saradnji mogu zaključiti nove međusobne ugovore o saradnji.
- (10) Izvršni odbor utvrđuje, u obliku obrasca ugovora, minimum uslova koje ugovor o saradnji treba sadržavati. Matični klub i ugovorni klub ne mogu ugovarati odredbe koje su u suprotnosti s ovim Pravilnikom ili obrascem ugovora, a u suprotnom će takve odredbe biti ništave. U cilju kontrole sadržaja odredaba ugovora o saradnji, isti se po zaključenju obavezno putem emaila dostavljaju na pregled organima za verifikaciju ugovora NS/FS BiH i entitetskih saveza.

### **Član 4.**

- (1) Ugovorima o saradnji može se odrediti da igrači registrovani za matični klub mogu nastupati za ugovorni klub.
- (2) Mladi igrači mogu nastupati samo za seniorski tim ugovornog kluba.

(3) Mladi igrači imaju pravo nastupa i za svoj matični klub i ugovorni klub, ali ne smiju nastupiti istoga dana na dvije utakmice. Samo tri mlada igrača sa liste prijavljenih igrača iz stava 5. ovog člana mogu nastupiti za juniorski tim (redovnog godišta juniora) matičnog kluba u stalnim takmičenjima.

(4) Ako matični i ugovorni klub igraju utakmicu u okviru stalnog takmičenja isti dan, matični klub može uvrstiti u tim samo jednog mladog igrača bez pisane saglasnosti ugovornog kluba.

(5) Ugovorni klub je dužan najkasnije osam dana prije početka jesenjeg dijela takmičenja u kojem nastupa prijaviti do najviše 10 (deset) mladih igrača voditelju takmičenja Prva liga NS FBiH ili Prva liga FS RS.

(6) Najkasnije pet dana prije početka proljetnog dijela takmičenja klubovi mogu napraviti do pet izmjena na prijavljenoj listi, a dužni su najkasnije do roka iz stava 7. ovog člana izmijenjenu listu dostaviti voditelju takmičenja Prva liga NS FBiH ili Prva liga FS RS radi objave u službenom glasniku.

(7) Lista prijavljenih mladih igrača objavljuje se u službenom glasniku NS FBiH ili FS RS najkasnije tri dana prije početka jesenjeg dijela takmičenja ili proljetnog dijela takmičenja u slučaju iz stava 6. ovog člana.

(8) Mladi igrači koji su strani državljani prilikom nastupa za ugovorni klub ubrajaju se u ukupni broj igrača stranih državljana koji imaju pravo nastupa u određenom stepenu takmičenja.

## **Član 5.**

(1) Mladi igrači registrovani su samo za matični klub.

(2) Mladi igrač je dužan da, prije predaje liste iz člana 4. stavova 5. i 6. ovog Pravilnika, dostavi pisanu saglasnost za nastup u ugovornom klubu, a koja predstavlja sastavni dio njegovog ugovora sa matičnim klubom.

(3) Pravo nastupa za ugovorni klub utvrđuje se na osnovu uvida u objavljenu listu mladih igrača, a zdravstvena sposobnost ispisom iz COMET informacionog sistema.

(4) Za igranje i treniranje mladih igrača ugovorni klub od matičnog ili bilo kojeg drugog kluba ne može tražiti nikakvu naknadu bilo koje vrste, uključujući i naknadu za treniranje igrača ili naknadu po osnovu solidarnosti.

(5) Ugovorom o saradnji se ne može odrediti da ugovorni klub preuzima cjelokupne ili djelimične finansijske obaveze prema mladom igraču, a koje proizlaze iz ugovora s matičnim klubom.

(6) Ugovorni klub ne može preuzimati prema mladom igraču nikakve finansijske obaveze.

(7) Nastup mladog igrača za ugovorni klub ne smatra se transferom shodno odredbama Pravilnika o registracijama klubova i igrača i statusu i transfetu igrača NS/FS BiH.

(8) Opomene na utakmicama i izrečene sankcije mladim igračima vode se, odnosno izdržavaju, u skladu sa odredbama Disciplinskog pravilnika NS/FS BiH.

## **Član 6.**

Ovaj Pravilnik stupa na snagu i primjenjuje se danom donošenja.

**PREDSJEDNIK**  
**Vico Zeljković**